

四庫全書

集部

欽定四庫全書

集部

鷺湖集卷二

詳校官編修_臣 翟 槐

中書_臣 劉源溥覆勘

謄錄貢生_臣 吳士英

欽定四庫全書

集部六

提要

鵞湖集六卷

別集類五 明

臣等謹案鵞湖集六卷明龔穀撰穀鉛山人
明史無傳惟太祖本紀載洪武十三年八月
丙午置四輔官以儒士王本杜佑龔穀趙民
望吳源為春夏官而亦不詳其本末考鉛山
縣志稱穀先以明經分教廣信輯朱子說補

六經圖御史葉孟芳薦其學行徵入為四輔
官以老乞歸又召為國子祭酒卒於官著有
經野類鈔二十八卷蓋亦窮經篤學之士也
其集見於焦竑經籍志者六卷流傳甚夥程
敏政明文衡黃宗羲明文海蒐採極博而均
不及其名姓則亡佚久矣今惟永樂大典尚
頗載其詩文詩雖多沿元季餘波而清婉諧
暢亦自琅琅可誦文則原本經術結構謹嚴

實能不愧於作者其送周倬張溥使高麗序
稱洪武十八年命倬等往封國王而明史高
麗傳失載其事又贈劉叔勉奉使西洋回序
稱洪武二年春詔叔勉往使三年夏纔至西
洋而明史淳泥傳乃稱三年八月命御史劉
敬之往使閱半年始抵其國年月參錯不合
自當以數所記為得其實是亦足以資考證
也謹掇拾薈粹仍依原目定為六卷著於錄

乾隆四十六年九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

鷺湖集卷一

明 龔穀撰

詩

題施安友于堂

稽山蒼蒼越之故疆惟子之居肯構肯堂壘麓相須華
萼聯芳孝友之性發乎天常道與時泰名與世昌金玉
怡怡德音弗忘清溫有宜就養無方旨酒嘉肴吹笙鼓
簧秋月澄霽春日載陽綵袖齊翻于鄉有光稽山嵒嵒

越流息波爾弟爾昆如江如河立孝惟親立敬惟和賢
哉閔生名冠四科

橋門之南產蘆腹如貫珠十七八內官以為瑞
獻之

皇明屬休運聖澤流無方雨露所霑被穹祇獻嘉祥奎
壁麗中天昭昭煥文章精華入厚土變化珠玉藏橋門
東南隅畦蔬茂且昌土酥生其間希異不可常纍纍若
聯珠皎皎如截肪根懸素瓊琚葉秀青琳琅老圃事灌

既內侍誇才良得之不敢餐金盤獻明光喜氣動天顏
薦裸心弗忘神靈式昭格時羞匪烝嘗謂宜比瓜瓞兆
此百代康金陵本形勝沃野千里強我我素王宮奕奕
三鱣堂菁莪育羣英蘋藻流世芳甘美萃天和易充藜
苒腸豈無同穎禾九穗歸魯邦豈無兩岐麥貽我來於
皇嘉蔬孰與儔金芝產齋房人能咬菜根愈久名愈香
草蔬本無情一旦升廟廊吾道日光輝聖壽天久長

寄餘干徐仲敏高克誠二良友兼贈彥明原祐

丙午之夏余寓于越與二公相知及己未歲忽
彥明原祐相過彥明則克誠之弟原祐則仲敏
之子也

我昔來華原適遭亂定初崎嶇訪家室於邑返故廬維
時方盛夏日永暑未徂問津川無航問道途無車山家
得少休快此蕪旬餘南州一高士先卜王翰居晨夕相
過從義高意勤劬雲蓬有賢孫萬卷藏家書時來候契
濶詩酒仍相娛長松結夏蔭衆木枝扶疎笑語坐移日

交契金石如不意旅寓間見此集許徒由來十四秋荏苒流居諸片雲隔嗣音久闕鴈與魚諒彼懷舊心豈不長嗟吁兩地各皓首獲落真成迂高生尚黑頭已喜登天衢斯文固有幸不免勞馳驅松茂栢須悅彼智此則愚郡齋雨初晴燕坐鱸堂虛有客忽相過攬衣問誰歟衣冠出名門濟濟文義俱話間得出處使我心疾除明時需才賢鄱陽古名區况乃賢父兄家世耽文儒賤貧豈不樂榮達多憂虞行藏在用舍與世同卷舒勗哉二

金方已入卷一
君子必則甯與遂歸家盡孝友爲政當何殊吾觀聖賢
心老大志不渝

周澹齋琴邊秋興

遙岑隔雲煙空谷蔽榛莽何年發幽貞異境豁弘敞林
寒碧篠生石古蒼苔上晨登撫瑤琴暮歸倚藜杖一鼓
忘世紛再彈絕塵鞅猿鶴留哀音風泉苔遺響誰持方
壺圖爲我澹齋賞知爾諧素心令人動遐想彷彿連郊
墟蕭條異疇曩雖云襟喧囂母乃異天壤喬木陰扶疎

故園色淒愴安得從爾遊亦以長吾長

題西莊贈王文奎下第後省親

會稽文獻邦人傑乃地靈土俗無澆漓山水有餘清先
民樂趣藏於焉解其纓棲遲族寓間百世流芳馨名郎
邁時流髫髻若老成卜鄰西莊上跡晦心則寧黍稷被
東阡桑麻藹前榮詩酒足自娛勢利鴻毛輕弱冠嗜經
術詩禮聞過庭詞華發天藻俊造蜚英聲薦鶚萬里秋
曝鯢千丈冷漆雕不我欺閭丘徒自盈虞庠重琢磨益

友歡送迎翻思清溫日不覺喜懼并明發乞歸省愧我
非陽城翩翩孤征鴻搖搖雙旆旌路若過山陰為我觀
蘭亭剡溪雖懷賢興盡宜宵征升堂問起居拜舞還自
驚去時尚朱顏今朝鬢星星咄咄山澤癯亦能奮翹英
况爾瑚璉器宜不圖騫騰鼎茵有其期菽水何足矜男
兒志四方莫作兒女情

題徐用之助教慈訓堂

南州一高士晦跡衡發間六歲失所怙立身何艱難高

堂有慈母盡瘁心力殫年甫二十四掩鏡啼孤鸞紡績
事教養辛苦摧肺肝歲時奉祭祀難黍供盤餐殷勤冀
成立宗嗣得無患子母相依影隻形更單兒身壯有
室母心方燕閒乳下三歲兒況復哀笄鰥保抱恤疾
衣食防饑寒三世各一身誰不為悲酸人願天弗違竟
使嗣續完母頭既垂白兒亦雙鬢斑綵衣戲堂下五色
紛斌爛清溫適母宜甘旨盡母歡樹彼護草花慈訓誰
與顏慈訓不可忘恩重如丘山賢孫誨上庠耿耿心寸

丹有志在補報無時涕洟瀾求詩紀其實千載爲興觀
題山水及古松扇面

橫橋壓長溪高樹倚絕壁草屋何人家開門候佳客清
風招不來白雲渺無跡毋使元規塵污我遠山色

長松生澗阿絹素尺不盈昂歲煙霧姿蕭騷風雨聲梁
棟固有朋山林豈無情少留天地間歲寒保堅貞

悅椿堂

漆園有椿松鬱鬱生澗阿鳳葉青參差虬枝碧差栽冰

霜久凝沍雨露頻漸磨高視天壤間閱歷年歲多下結
百畝陰上懸千丈蘿秋天立蒼鏐春風響鳴珂中有純
孝人築室數仞過滌灑事甘旨志養親色和白魚入厨
饌黃雀在網羅鯉庭多燕閒怡顏盼庭柯栢府方筮仕
庭前烏尾訛願推孝養心四海霑餘波

蓮花峯

羣山如龍驤迴瞰北郭門四顧原野開川谷雄吐吞坡
陀顯巒麓蒼翠連丘樊自笑蓮花早始覺太華尊青天

削芙蓉彷彿難具論
鵲湖有良田藹藹阡陌分
秋風禾黍登春雨桑柘蕃
苟非耕鑿勞曷以供晨昏

侯侍郎庸迎養

東萊有客人中英滿腔忠孝由天生
讀書不作章句陋居官所期肝膽明
往者嚴君困三宅父子東南五千隔
孤苦零丁十五秋一別何曾見顏色
兒年初學數與方父不少留兒涕滂
慈闈紡績事教養執經問道親虞庠
前載春官取科第父若有聞心亦喜
朝朝秉筆在鵷班

情幾欲陳行復恥聖恩如天願弗違詔許馳驛迎親歸
拜辭闕下一喜懼消息近日無安危雲山萬重隔閨越
見面有期思愈切來日非如去日多舊愁不與新愁別
天風吹衣道路長聖君寵厚親壽康炎州瘴霧避爽氣
桑榆晚景昭回光遙知入門問安否百歲千歡交肺腑
秉燭渾疑再世逢稱觴更盡中腸語歸來感激謝君恩
枯朽一旦生陽春周公拜前魯拜後滿庭光顯難具論
子祿愈豐親愈壽此事人生亦希有別恨何嫌地渺茫

欽定四庫全書
孝心直與天長久丈夫志氣今古同爲子必孝爲臣忠
累茵列鼎足榮養更以勲業垂無窮

贈吳興陸穎筆花軒

吳興製作天下奇筆花名軒誰與題霜毫挿架千萬枝
棗心蘭蕊芳菲菲固知文房有至寶雨露涵漸爲誰好
自是春風筆下生時人只道花開早

贈沈翥由儀部遷宿州學正

江頭日日春風起柳花飛渡春江水東吳客子問歸期

回首雲山隔千里昔來宵監知幾秋鱸魚不動鄉關愁
五車萬卷恣搜索聲譽早播金陵州筮仕春官咸見許
每接變龍趨步武中原文獻久荒涼復遣橫經施教雨
屠羊反肆未足多數學亦得重漸摩乃知天造有深意
千古不用傷丘軻

次韻翁好古道過鄉溪寄別黃貳守

十月流澌不成凍異客他鄉只如夢玉溪邂逅忽盍簪
青眼相看各神竦萬里番禺不倦勞此身端爲斯文重

豈無獻賦誇甘泉豈無勲策圖凌煙丈夫聲聲自有志
立身行道非偶然孤猿獨鶴渺何許新詩滿幅來鸞箋
要追蘇李凌鮑謝肯與餘子爭婣妍鄉溪之濱有逆旅
清興留人不能去信知王事有程期千載風雲一朝遇
鵬路何曾限吳楚大舶中流夾雙艫明朝回首隔鍾陵
水闊天低雨如霧

湖心夜宿田家問道官陂訪舊

田家住在鄱湖側僻處湖鄉廛市隔自言三世在此居

自幼何曾識賓客上官托宿叩我門旋掃階除已昏黑
呼婦出門供水薪童稚驚竄呼不得庭中爇火燎衣裳
厨下燒湯洗泥滓莫嫌窓戶多風寒剝把蠶筐障檐隙
湖魚旋網味差甘粳米新炊飯少白今年秋旱田不收
無酒可沽君莫責明朝飯罷整行裝緩步從容莫匆迫
門前有路到官陂莫過橫塘向東北

中秋之夕分憲張侯以陸羽泉煎茶分惠

昔有仙人陸鴻漸性嗜茗心骨清嵯峩石甃舉品第

好山處處留佳名建溪顧渚得異品惠山之外惟中泠
琵琶洲前千越溪鐫石作竈留山垞龍涎傾白古鼎翠
星火迸石寒煙青蓬萊弱水恍不隔一啜世累鴻毛輕
靈山之陽東岡麓井冽寒泉皎如玉何年鑿破太古心
云是仙人手親掬乃知往者未足珍此茗此泉當絕倫
誅茅卜居總爲此一丘一壑聊栖真汲清淪碧匪曾倦
咫尺市廛少相見高情不免留人間却著茶經二三卷
爾來寂寞千載餘山荒石老人丘墟樵夫牧子罕知識

山僧野老空長吁西江分憲列仙輩暫屏喧囂駐旌旆
雲闕霧幌豁然開刺水殘山價增倍踟蹰歸馬來自東
飄如翳鳳乘天風百年窮達固有異萬古高義將無同
官舍歸來細烹汲飛翠浮光兔毫濕韋布書生例見邀
高牙大纛嗟何及寒儒未必工文章三椀浪說搜枯腸
佳期三五夜不寢起舞皓月回清光妻孥大醉我獨醒
仰看桂花月中影欲讀茶經且復休漫寫狂歌發深省
安得相從賦石鼎

移忠寺

人生自古誰無死蓋世功名只如此丈夫事業在致君
要把香名照青史欺君賣國將謀身讒言構禍誅功臣
身雖富貴國僅免舍生取義為何人荒墳蕭蕭秋草歇
翁仲含羞向誰說君不見西湖之上岳王祠常有遊人
拜忠節

餘干舟中偶成

蘆花如雪楓葉丹石崖細菊花班班漁翁收釣煙水寒

栖烏啞啞啼夜闌
篙師清晨理輕楫
手把黃蘆掃霜葉
白頭老父一何忙
兩脛崎嶇趁朝涉
岸頭嬌婦啼嗚嗚
兒猶在乳家無夫
江南地冰最宜麥
縱有耒耜誰人扶
聞道如今一陽復
賀使紛紛相繼躅
彼蒼回斡四海清
大地春和吾亦足

題耕樂圖

賈將軍才且雄
右手挾槩左掛弓
用如鵬鷃搏秋風
狐兔不敢藏蒿蓬
偶辭朔雪望南斗
小試良才酺溪口
十

里朱旗畫鼓迎三年白帽青山走良田百畝溪之濱徼
巡警息民風淳花村晝閒綠野闢山犬不吠犂牛馴將
軍不嫌祿厚薄公暇應能事耕鑿體倦那知有苦辛心
閒自以耕為樂小麥青青大麥深平疇水滿秧浮針農
家歲計在一飽一飽寬盡將軍心薌溪之濱有逆旅野
興留人不能去布穀啼開綠樹煙鷺鷥飛斷青山雨將
軍底用身親耕居官所期教化行民有恒心有恒產放
僻邪侈何由生吾家老遂誰能續解使豪強變雍睦潢

池赤子休弄兵刀劍從今盡牛犢

秋江送別圖贈臨川人應召

君不聞吳江秋葦蘆之興難淹留又不聞楚江秋琵琶
撥盡相思愁秋江之別不可送今古別離只如夢陽關
三疊酒一樽富貴功名竟何用故鄉雲樹長青青故鄉
父老難爲情揮鞭落日一回顧十里五里長短亭馬鳴
蕭蕭趲行色舟子艤船官渡側鷓鴣啼罷巖猿哀目送
行雲一淒惻汝之水盱之川秋波淡淡秋山連離情莫

為江波牽家山一別心茫然飛鴻滿天秋色裏悲風瑟
瑟中夜起來石江邊悵望人至今萬斛愁難洗何人寫
此秋江圖使我一見重嗟吁江淹之賦說不盡離愁別
怨無時無

桃源圖

桃源之景清且閒秦人避世居其間竒蹤一撇不復見
但見萬疊皆雲山當時豈不戀鄉土急欲逃生免愁苦
初期一去即來歸豈謂家成遂終古梯空涉險身忘疲

提攜襁負聲嗶啞豁然世外得絕境太朴未鑿無澆漓
良田可耕樵可牧香稻堪炊酒堪熟明年春雨長桑麻
刺種紅桃滿溪谷桃花開後知春深鶯啼燕語花陰陰
飛英不合泛流出勾引漁子來相尋山翁漁子不相識
倚棹相看問疇昔災祚承平八百秋更無人解傳消息
衣冠俎豆將無同送迎猶是秦人風黃鷄白酒可留客
歸心不用殊匆匆盡醉姑留一宵住明日相辭出山去
扶舟傍岸覓來踪水闊山高不知處

爲張邦英題錢舜舉折枝梅花

西湖美人風韻奇玉爲資質水爲肌江梅向暖開南枝
美人與之同襟期月香水影有妙句橫斜浮動無人知
世間凡卉不敢並香名萬古芳菲菲羅浮美人亦大好
笑靨盈盈破春早明日蕭條客夢醒參橫月落春光老
惻悵松林不見人多情翠羽空相惱繁花亂挿滿頭歸
芳心寂寞憂心禱吳興美人真可人興來亦寫梅花真
奇奇恠恠發天趣斯須幻出江南春疎花綽約有生意

蛟綃半幅無纖塵固知佳畫不易得百年誰復藏其珍
朝雲不入梨花夢鈴閣無聲畫屏凍淑態偏嫌夜雪欺
幽風不許春風動意態娉婷富貴羞精魂冷落清寒共
時指病目一摩挲萬紫千紅竟何用山陰古多圖與書
張郎自是山陰癯平生愛畫入骨髓得此寘之座右隅
我生亦有畫梅癖對此不覺形神俱含丹吮墨我不如
還君此畫長嗟吁

方壺墨竹為劉亨道題

粉箋錯落生簑管琅玕翠羽參差光玉堂夜半秋雨涼
西風瑟瑟吹鳳凰金門羽人方壺老曾向方壺拾瑤草
晚歲歸來長萬竿清陰滿地無人掃清陰不掃真可憐
殘陽曉月爭嬋娟戲拈秃筆一追寫却立四顧心茫然
劉郎展玩不忍釋邀我題詩寫空碧此詩此畫非等閒
願爾卷懷聊自適

石日晷歌

它山之石玉可攻嶙峋鑿破精磨礪幹支參錯定南北

髣髴辰極居其中形如倚蓋奠鰲足圓若壁月當青空
週遭百刻分晝夜毫釐不差理莫窮昆蟲草木識節序
孰謂造化無全功昔聞姬公宅洛邑度地測景分西東
短長已足辨寒暑朝夕更可期陰風我言物固各有遇
片石亦得竒遭逢萬牛鑿至九鼎重聖恩已許留辟雍
璿璣玉衡屹相向占候彼此將無同學如不及有謨訓
寸陰莫遣成匆匆瓊臺珠露尚厭浥朝陽已映扶桑紅
國子先生正師席衣冠濟濟皆儒宗寒予桑榆尚未晚

不用顧影嗟轉蓬一線頻添足自慰八磚影過成踈慵
鱣堂絳帳深重重從容退食方自公庠澤晷刻日將午
更以經史開羣蒙

鼠鬚筆

狸奴與爾休爭雄兔穎為爾無全功毋持兩端廢科斗
直變五枝為雕蟲中書晨將黑貂珥虛宿夜泊文昌宮
班超欲投恐近器漫以心畫昭無窮

望夫石歌

一從藁砧去無心事機杼暮暮復朝朝凝情立江渚歸
帆數盡不見夫夫不歸來心獨苦寧知幻化只斯須留
得虛名竟何補胡不當初莫嫁輕薄兒貪名徇利輕別
離何不終身學取秋胡妻採桑紡績爲裳衣人心孰不
戀鄉土百年會有歸來時汝夫若戍交河北天下有時
征戰息汝夫若把奇策干王侯名成也合衣錦圖歸休
烏栖故林狐正首丘丈夫安得長遠遊胡爲朝望復暮
望化作石頭在江上室中有兒堂上有姑姑老無所養

兒幼誰人扶兒無母兮走斃斃姑失婦兮啼鳴嗚汝夫
一朝還汝已化為石石在路傍夫不識夫心始悔不早
歸石本無情豈相憶相憶知奈何有淚如雨空滂沱古
來貞節人湮沒何其多石在天地間萬古不可磨石不
磨名豈滅只恨恩情中道絕遂令江上遠行人見此應
須悔離別君不見蒼梧萬仞湘水深竹上斑斑淚如血

蛾眉亭

煙光水色涵清輝兩山相對浮修眉一如美人斂態不

自持又如新月倒影相照寒玻璃
姑熟江梁山峽秋水無波綠於鴨
不是新婦磯頭翠黛顰不是瑤池
王母霜蕭颯翠顰日日空自顰秋
霜蕭颯何時春未如青山綠樹萬
古不改色坐看滄海生黃塵

周如心溪莊八首

聞說溪莊上先生舊隱居
村春閒野水高棟接茅廬
城客朝携酒溪翁夜打魚
功名身外事不醉復何如

城南烟景好日晏渡溪遲
一徑竹深處四簷花落時
雨

晴鶯喚友風暖燕呼兒境寂觀羣動悠然樂不支

溪深纔數里塵靜少波濤宿鶯便青草嬌鶯妒碧桃戶
當松逕黑橋倚石梁高尚有絲綸在猶堪掣巨鰲

昔人今已矣溪館為誰開野鶴穿雲去林鳩喚雨來松
邊深澗谷花外小亭臺俛仰成陳迹披圖一快哉

開徑通幽嶼臨流結小亭引來溪樹碧分得泮芹青燈
火書連屋壺觴月轉庭因悲城市促塵土漫勞形

故園雖久廢風景尚依然鶯起灘頭雪蟬吟澗底泉汀

煙浮蒼莽野竹雜潺湲祖笏雖堪寶寧無二頃田

冰溪清淺處瀟灑一莧裘竹色侵書幌荷香拂釣舟黃
雲孤島沒落日亂山稠我亦淹微祿無因得少休

主翁生事少佳興在樵漁野客陪尊俎朝官問起居月
移窓上竹風亂枕前書寂寞百年後方知有甯蘧

贈別二首

金陵分手再江路歲華深日落鴻遵渚星稀鵲遶林行
藏君獨善憂患我同心青鏡頻看髮母令白雪侵

歲律催遲暮鄉心適遯潛子鵝春餅細香菜晚羹甜茅
岫山雲合桐灣客路淹幽栖如可卜囊罄亦何嫌

欽定四庫全書

鵲湖集卷二

明 龔敏 撰

詩

吳伯舟歸養

枯蒼山下白雲飛
漢水江頭綵鷁歸
微祿可能三釜養
遠遊應是五年違
庭闈有夢關山隔
鄉邑無書故舊稀
不爲鱸魚心獨苦
黑貂幾誤老萊衣

次韻萬益謙

半載飄蓬兩鬢華又驚春信入梅花昔貪朝市風雲闊
今愛山林歲月賒縱步且須留謝屐僂遊何必怨張槎
勞君故有詩相寄隨意行吟到水涯

偶因行役過君家山路迂迴菊有花濁酒慙知留我待
香粳不用喚兒賒舍南久有歸田耜戶外今無上漢槎
最愛蘭蓀芽競出一經垂訓足生涯

徵君雖老尚昂藏珍重斯文與有光詩比杜陵方近古
賦如賈誼却升堂披離蒲柳當門綠奕葉芝蘭傍砌香

尚有惠連春草句夢回清興滿池塘

白髮相看勢利忘德星千載聚文光庾郎久不依蓮幕
嚴武何曾顧草堂霜樹錦楓留客醉露叢黃菊喚人香
此翁近亦無機事拍拍輕鷗水滿塘

送張邦英別歸會稽

柳怯春寒未放綿故人歸思倍淒然蘭亭日日堪攜酒
剡水時時好放船微雨輕塵催去馬翠烟芳樹老啼鶉
知君更有重來約不用看雲白晝眠

其弟邦秀信郡長司也以訪邦秀回

故用少陵憶
弟看雲事

贈毛生兄弟從父守禦四川

綵袖雙瞻難弟兄錦江萬里計修程
舟行濫瀕風生檝家近蓬婆雪滿城
諸葛勲名新將畧二蘇文采舊家聲
浣花溪上多才思莫為馳驅廢短檠

松江釋信中孚鏡觀頌

秋水泓泓混太清本無色相自虛靈
真心似覺身爲幻過眼空疑影附形
好爲空花除妄滓莫將止觀泥殘經

檐頭探取中孚畫歸對包犧問姓名

送貴溪張尹丁父憂還家

花縣春風柳絮飛傳聞茂宰有歸期都門莫訝雙鳬遠
山鳥應嫌匹馬遲堂上琴門公事少沙頭酒盡客心悲
孤蓬夜雨郵亭晚掩涕長吟陟岵詩

寄友人

金陵自古帝王州水碧山青節氣柔夜雨催殘黃菊晚
西風吹老白蘋秋千家月色連天白萬戶砧聲接地稠

兩載鄉音無使到豈無鴻鴈在汀洲

寄永福寺友人劉潤芳

故里雲松不厭看又飛金錫度長干鍾山得似芝山好
道海何如學海寬羨爾心如禪定久愧予身與客趨寒
自從別後音書隔天外征鴻字字安

江東遊子問歸期之子何心去魯遲臨汝雪晴宵剪燭
武陵花落晝哦詩百年士論歸名節十載交情倚夢思
明日重來尋舊約春風攜酒省靈芝

贈陳積慶之官宜黃令

西江寸水少波濤，令尹傳聞得俊髦。
百里可能淹驥足，三年漫爾試牛刀。
文昌閣下琴書靜，華蓋峯前雨露高。
底事橋門重分手，催科撫字要心勞。

寄貴溪令張伯亨

三載橋門麗澤深，寫詩聊記別來心。
半江自剪吳淞水，百里休慙枳棘林。
客散郵亭青嶂晚，鳥啼公館綠槐陰。
催科畢後無餘事，長日須彈子賤琴。

贈人使回

皇皇使節自東來千里雲山瘴霧開
官渡解鞍憐驛裏郵亭看劍拂塵埃
魚龍水濶波聲遠梅柳江春暖氣回
欲買小舟聯後載弱流今已隔蓬萊

贈傅謐之官泰寧丞

百里傳呼二尹來理民須仗濟時才
舟行越水鯨波息路指閩關瘴霧開
羣吏不須鈐紙尾蒼生無復墮顛崖
橋門此日難分手千里馳書慰老懷

幾度山齋眇夢醒風泉石瀨瀉清泠雲陰半染松邊黑
苔色全添雨後青人帶殘陽歸谷口鶴翻清露滴林垌
如今收拾新圖裏始信徐生筆有靈

贈筆生徐原珪

三絕吳興價最高品題何待見吾曹南山未必無清節
東郭爭知有俊髦吏部文章徒炫美中書官賞不酬勞
玉堂賴爾能揮洒尚寫新詩換錦袍

贈松江王千里太守回蒼梧

司業王嘉會弟也

贈鐵松

鐵色蒼官出澗阿風霜飽歷歲年多根蟠翠石猶存鑛
雨溜青銅不改柯鎖甲凌雲空自脫戟枝臨水亦難磨
公輸歐冶休相顧留取清陰覆綠蘿

天地為鑪萬木焦長松依舊翠岩堯洪都一柱苔空老
赤碧千年戟未銷澗底冰霜明節鉞林間風雨聽簫韶
矢人莫把高枝刺留與夫差射海潮

贈畫師徐碧澗

舊是東吳隱逸人忽看飛旆擁朱輪
一年夢隔三山曉千里恩涵五嶺春
鈴閣雪消梅蕊重彤墀風暖棣華新
遙知父老郊迎日樽酒黃堂介壽頻

贈中齋

身侍紅雲應白雲
哲將大節報君親
玉皇香案三呼日
金母瑤觴一笑春
天上星辰高北斗
人間草木耀南閩
聖朝孝治隆千載
指日恩霑紫誥新

海月壽呂養浩

碧落空明翠欲流
滄溟東角暮雲收
光搖銀闕三山曉
冷漾冰輪六月秋
五夜潮回蟾影浴
九天風動桂香浮
廣寒分取長生藥
穩泛仙槎訪斗牛

瑞洪夜泊

三月江南雨滿湖
魚吹花浪鳥相呼
踈燈照水夜明滅
遠樹入雲山有無
澤國田硯人難草
酒船風靜客撐襦
柳陰不見垂綸者
却道煙波是畏途

春日登臨川青雲亭故址

青雲亭子有遺基
曉蹋春陽信馬蹄
十載干戈愁裏見
百年歌舞夢中迷
雪消華蓋三峯出
雲捲金臺五石齊
風物不因城市改
酒酣歸路欲鷄栖

滕王閣

高閣凌空歲月徂
王生文字已模糊
黃麻莫為青蚨賜
綵筆能將粉蝶圖
澤國波濤仙島迥
重城煙雨蜃樓孤
遊人不識興亡恨
惟解臨風倒玉壺

薌溪道中

不因行役愛追遊處處長亭得少休官道行人看虎跡
野塘稚子拾鷄頭青山已是三年別華髮堪為兩鬢羞
溪上梅花仍有約莫將歸夢付淹留

三山磯

三山直上與雲齊海色蒼茫楚水西波浪不驚沙鳥沒
蘼葭無盡塞鴻低風生野戍旌旗閃日落荒村虎豹啼
莫向鳳凰臺上望遙遙空使客心迷

八月十六夜泊鄔子寨示祝權

鄒子巖前江霧開
瑞州河口北風回
南山一點青螺小
鄒水千羣白鴈來
明月尚圓天氣好
良宵虛度客心哀
故園松桂無人管
只恐秋霜兩鬢催

女兒港

剩水殘山自古今
美名何必直千金
防身未識姑嫜禮
擇配那知父母心
眉黛眼波春思濶
野花山葉暮愁深
猶勝思婦高樓上
一曲離歌淚滿襟

與睦州甘彥初同知同過弋陽晚泊

十年重過弋陽溪野店山橋處處迷
烏鵲攢枝驚虎嘯
獼猴曾過學猿啼
客行官道霜猶濕
人醉郵亭日未西
說與睦州賢別駕
好因凋瘵問蒸黎

弋陽道中

偶乘小蹇度山阿
記得當年舊所過
雲護早霜晴不穩
路穿陰嶂濕還多
野人生計渾全薄
行客鄉音一半訛
滿眼黃蒿能幾闊
遶頭何苦用干戈

螺磯廟

姑熟江頭浦溆迴雲岑煙島翠崔嵬樓穿蜃氣波心出
山戴鰲宮海上來石見早知潮水落風生遠見客舟開
天教迥隔江淮壤不著遊絲點綠苔

過赤壁

赤壁爭雄又幾秋江波不斷古今愁風腥遠水魚龍混
草沒荒城鹿豕遊樊口斜暉穿樹出漢陽孤嶼接天浮
年光不逐豪華去賸有殘碑記竹樓

次韻吳自修遊南巖

南巖地偏罕人跡問君胡為來此遊偶因人生閒暇日
況當天下承平秋飛泉自落屋西畔青山只在巖上頭
招提境界不易到松篁一逕通深幽

溪南十里南巖寺老栢經年泣象龍林屋山光春皎皎
石闌雲影午重重勝遊佳客身親到惠寄新詩手自封
南渡老臣遺墨在想因忠憤久填胸

再過上饒夜宿城南逆旅

狂客征衫不自由綠陰啼鳥豈知愁半簾曉月湖邊柳

一片夕陽山外樓
水落漁翁尋釣石
風來梢子促行舟
兩年三度經行此
羞對東風話舊游

鳳凰臺

聞說高臺有鳳凰
如今芳草思茫茫
山環帝里南來盡
水繞石城西去長
夔樂九成春寂寞
秦簫三弄月荒涼
綵雲一段無消息
幾樹梧桐老夕陽

五老峯詩贈南康守

敷淺原頭列嶂開
湖光倒浸碧崔嵬
九江滙澤流山雪

三峽飛泉吼石雷
李白新題蒼蘚合
匡君舊隱白雲堆
好將拄笏朝來意
付與黃堂酒一盃

蓮花峯

清塘山色碧如流
荷葉荷花幾度秋
太乙仙人青玉舫
沅湘詞客翠雲裘
平湖遠遶連舟渚
芳草青青隱鷺鷥
晚雨漸乾霞靄散
教人虛泛採蓮舟

女兒港阻風

老屋踈籬半掩門
斷煙踈柳幾朝暉
雨昏潮口生春水

天入江東有暮雲山翠猶疑粧淚濕眼波如恨寶釵分
宜無漁笛蒼茫裏垂老飄零不忍聞

遊鷄鳴寺和伍助教朝賓

不為嬉遊廢簡書偶承恩命得驪虞吳中綠樹今無恙
洛下青山舊不殊蕭寺飛薨齊岵嶠胡僧尖帽織毼毼
太平有象無人識願播仁風被海隅

突兀禪關隱薜蘿閒扶藜杖一來過蒼髯楚客留篇什
碧眼胡僧禮貝多南澗露芹分壁水北橋煙柳拂金河

相逢莫說無生話雪案螢牕要琢磨

化人宮殿倚巍城獨立凭高眼倍明僧設番茶澆磊砢
童燒山葉煮清冷人間白馬何年返天上金鷄半夜鳴
南望鳳臺應咫尺朝陽還聽舜韶聲

鷄鳴之上接清廟畫棟輦飛出林杪馬埒風高首著秋
鳳臺日上梧桐曉雲消天宇山色明潮落江堤水聲小
垂老何因樂意多吾皇整頓乾坤了

過潤陂

客裏深思行路難歸心何事更盤桓風回水國波聲小
雪滿江天鴈影寒莫把驛程思遠近祇憑鄉夢報平安
因嗟白髮催人老青鏡流年仔細看

過湖口寄東吳故人

天塹茫茫水國分徼巡鼙鼓隔江聞艣聲搖落山頭月
颿勢衝開嶺上雲拜舞近辭丹鳳闕去留今共白鷗羣
九華秀色青如筆欲寫交情遠寄君

仙人石

石上仙人去不回
洞門深鎖白雲堆
鹿行澗底窺瑤草
鶴過松陰步紫苔
初起無心成久立
子房多病盍歸來
等閒識得尋真路
千樹桃花次第開

過望夫石

獨立長亭望眼空
江波有盡思無窮
啼痕暗滴莓苔雨
瘦骨寒生薜荔風
萬里音書何日到
百年恩愛此心同
天荒地老名難泯
不比巫山一夢中

碧筒飲

笑遣芳樽吸綠荷風絲撩亂粟芒多湘妃小蓋擎波出
太乙仙船載酒過玉露引香通鼻觀碧雲分影照顏酡
獨醒楚客應嫌此故剪秋衣換綠羅

故山敝廬不庇風雨告歸補葺述事興懷

玉川破屋不全拋若比揚雄欠解嘲稚子何心守環堵
旁人應笑捲重茅誰憐門樹烏三遠自愛雲松鶴一巢
安得萬間寒士庇無令風雨薜痕交

池口阻風懷故人東流宰周德平

莫向池陽問酒杯
好懷應爲故人開
九華山曉千峯出
三峽江寒萬里來
塞鴈未隨南陸轉
楚雲多逐北風回
浮名本自無羈絆
應笑先生白髮催

登滕王閣故基

高閣千尋俯綠波
波心倒浸碧嵯峨
西山鷄犬雲中去
章水魚龍影裏過
煙艇客眠洲渚靜
風櫓人醉管絃多
重來指點曾遊處
芳草連天一土坡

題金溪洪氏孝思亭

道上春風吹客衣
亭前碧草澹春暉
凭高忽若瞻雲起
倚杖空懷負米歸
水落江寒冰未解
土暄林茂筍初肥
吾生最亦思親苦
飄泊深慙與願違

題洪都鐵柱觀

西江江上有靈湫
上有仙人碧玉樓
百尺露莖埋故國
千年砥柱屹中流
曾漂蜃氣歸瀛海
不謂龍泉出劍州
誰遣戎衣塵溷久
股肱聞已進謀猷

南風吹海不成波
江右生民喜欲歌
玄化九天如有賴

神功千古自難磨夫差箭落江潮避溫嶠犀然水怪過
塵劫未能同幻滅好將銅狄共摩挲

遊先天觀

上清宮殿五雲飛名占先天識者稀不向虛無參妙訣
却於圖象探玄機中天日月開黃道列座星辰拱紫微
誰是虛皇壇上客夜深清露挹霞衣

武石潭阻水

雨過千村水自生梢人驚起又三更舟移似覺山平轉

雲動應疑月倒行
楊柳蒹葭渾莽鶻鷀
鷗鷺亂喧爭
家鄉有路歸心切
欲棄同舟豈我情

餘干舟中偶成

越水交流野逕偏
短篷斜繫竹林邊
楊花亂逐波心落
鷗鳥不驚沙上眠
春雨蒹葭人喚切
晚煙洲渚客愁牽
溪東即是桃源路
却笑漁郎不放船

松門石鏡

在彭蠡湖中

鮮痕零落翠光沈
磨洗空煩雨露深
壁月高秋懸太古

海天紅日散微陰久無粉黛窺鸞影還有蛟龍避水心
江客廿年頻過此繁霜殊覺鬢毛侵

孤山梅鶴

莫將梅鶴等閒看慣與幽人共考槃吟盡暗香還有月
夢翻清淚不知寒單于午夜聲初咽華表千年墨未乾
何似水光山色裏無言相對只盤桓

晴天廬阜

匡山高處接雲涯突兀遙瞻滙澤西拂曙嵐光浮劍戟

排空清氣豁端倪
岷峨地接南條盡
吳楚天連北斗低
寄語東林陶靖節
漁郎今在武陵溪

湖天一色

水色天光帶晚晴
泓泓澄碧湛虛明
欲看一鏡涵秋影
不著微雲點太清
星斗外窮千里目
波瀾中混古今情
落霞孤鶩滄茫裏
萬頃瀟湘畫不成

清鏡環翠

百頃湖光一鏡開
好山多處路縈迴
長松落落凌空出

綠樹陰陰繞澗來
晴日暖雲舒錦繡
淡煙踈雨暗樓臺
吳歌楚舞俱陳迹
惟見春風長綠苔

唐明皇遊月宮

自是君王厭萬幾
涼天清夜夢魂飛
素鸞並駕歸瑤闕
廣樂旋聞奏羽衣
蟾兔那知天廣大
山河不礙日光輝
翠華西幸蛾眉老
始信人間事已非


訪隱者不遇

偶訪臨川處士家
鍾山不受片雲遮
林花色奪宮牆粉

松葉香分石鼎茶心比彥倫須自愛學如康節厭人誇
何妨共醉重陰下烏帽蕭蕭鬢腳華

從軍人還鄉謁先塋

去國辭親二十年歸來哀痛抱終天心傾葵藿風塵際
淚灑松楸雨露前徐庶有懷方寸亂王陵多恨孝慈偏
男兒立志存光顯會見功成畫錦還



欽定四庫全書

集部

驚湖集卷三

詳校官編修_臣翟槐

中書_臣劉源溥覆勘

膠錄貢生_臣吳士英

膠錄監生_臣孫汝明

欽定四庫全書

驚湖集卷三

明 龔穀 撰

詩

觀早朝

玉案分香下九闕彤墀端笏列千官屠蘇且爲新年飲
象魏何妨浹日觀五色雲間簾影曙萬年枝上雪花寒
可憐鐵甲邊頭將舞蹈山呼耿耿寸丹

行素齋

百年隨分度光陰性道淵源夙所欽紫閣彤樓春鵲鵲
竹籬茅舍午沈沈蠻荆不廢鍾儀奏陳蔡何慙李路心
此外全非天賦予肯論朝市與山林

耕樂為蕭大有題

秧滿平疇花滿川犂牛將犢傍花眠鷺鷥飛斷橫塘雨
布穀啼開野樹煙隴上一蓑如昨夢隆中三顧是何年
莫因微祿淹山邑負郭今閒二頃田

題永思卷為考功某人作

寄跡銓曹歲月深
思親時復一霑襟
風雲不隔關山夢
霜露難忘簞簞心
古道白楊聲獵獵
西風荒草思沈沈
旨甘久絕梧楸遠
投筆長嗟岵岵吟

為朱允升題盤谷序後

黔上先生舊隱居
登山臨水樂何如
放懷不待盈樽酒
投老仍耽滿架書
鶴唳松間時對客
騶鳴道上幾回車
昌黎莫漫歌盤谷
留與閒身共卷舒

題蒼雲軒

滿谷簷簷綠未乾古苔深鎖萬琅玕無心隔斷千山曉
不雨翻成六月寒碧榦初齊猶繞繞清陰如染自漫漫
渭川煙景今猶昔誰復相從賦考槃

題祝洞天薌溪小景

林屋陰深鎖綠苔碧山當戶小樓臺眼前此景不易得
客裏好懷先自開鬼谷已難求彷彿天冠猶解寫崔巍
靈峯未必無佳處怪底遊人不再來

鬼谷天冠皆薌溪名靈峯則上饒

也之山

為謝氏題椿桂

聞昔燕山種德深
靈椿丹桂兩陰陰
一樽好為嚴君壽
三釜終酬令子心
竹帛流芳傳舊史
丹青遺畫見新吟
謝公不念蒼生苦
高卧東山自古今

碧雲軒為程有恒別駕題

太行西望路漫漫
一片孤雲正好看
尚有鶴書求放逸
那無鴈字報平安
宦情聲聲傷心苦
歸興遙遙見面難
何日綵輿迎養處
斑衣庭下足清歡

題句容宰王氏槐軒

蟬聲淒斷午窓涼
嘉樹陰深夾道傍
雲影翠連書幌暗
風花黃襯馬蹄香
牛刀漫試絃歌靜
蟻夢初酣歲月長
亦有雄文堪黼藻
它年重上晉公堂

題雙桂軒

小山佳樹愛幽深
並秀聯芳不作林
一逕露華秋冉冉
兩窓雲影晝沈沈
天風浩蕩清無際
月窟淒涼醉不禁
寄語吳剛莫相惱
須教接葉布庭陰

題凝霏軒

凝霏掩冉山巔岼歛忽變化渾無端
春陽弄霽曉光白
暮陰閣雨秋意寒
簷前樹色翠欲滴
戶外野花紅不乾
風塵瀕洞久莫到
何時一偕凭闌干

為吳端題靜學軒

境息塵空泰宇清
祇將經史寄高情
四時門館無私謁
半夜池臺有月明
座客爭誇吳季子
幕賓元是魯諸生
蘭階桂苑春長好
底用黃金遺滿籬

題煮詩軒

高人心不負幽期小結華軒要煮詩夢熟池塘春晚後
酒醒窓戶月來時大羹不和盃中味獨繭長纒甕裏絲
誰謂灞橋吟更苦蹇驢風雪夜歸遲

聞說名軒意最佳詩成端欲咀英華微吟聲遶羊腸陌
得趣香分石鼎茶墨沸秋濤濡槩几句融春雪透梅花
熟來不費推敲力誰遣松風漱齒牙

題洪都寫韻軒贈道士傅梅巖

瑤館玲瓏結綺窓
星姝曾此遇仙郎
紅塵失脚烟霞遠
青簡留心歲月長
墨漬春雲池水黑
朱凝秋藕露華香
金華不遠人間路
說與休文恐斷腸

涼翠軒

故人結屋嚴灘上
小小軒窓自不同
風捲雨聲來枕簟
樹移山色傍簾櫳
秋清未覺鸞簫遠
歲久應嫌鶴帳空
無限好懷歸未得
懶題安字寄征鴻

蘭室為隱君子題

一別靈均九畹荒高名千載為誰芳
秋花亞佩瓊琚冷
曉氣穿簾雨露香似有閒情依澗谷
那無清夢到沅湘
半年有箇同心友與爾同登魯叟堂

聞喜歸朝為雲南太守楊大本題

近分旌旆守藩維強把征袍換綠衣
越雋北來天路遠
牂牁南下客船稀黃堂酒散燈花落
鈴閣香銷蟬子飛
遙想杏花春雨裏鵲聲爭報遠人歸

聽春雨為茅山道士思親作

茅山聽雨結茅茨意恐紅塵惹鬢絲步鶴紫苔春滿徑
鳴蛙綠水夜平池杭稼已足菑畲願衣綠能忘簞簞思
綵袖魚軒今已矣黃冠野服總相宜

溪山舊隱為王宗禹題

彭澤江邊柳莫栽銅陵茂宰亦歸來山中白酒何時熟
籬下黃花幾度開林靜朝朝麋鹿過磯空日日鷺鷥迴
某丘某水猶堪指只恨如今半草萊

掀蓬圖寄友人

水邊何處覓芳菲
記泊孤山月影微
杖屨不須求澗谷
畫圖應遣入屏圍
含章半掩春嬌面
姑射低垂雪色衣
江上重逢休問語
別來何事久相違

雪夜觀胡貳令本道詩藁因題

久別可人胡貳宰
近來詩思夙無同
坡因海外文偏好
杜向秦州句轉工
漂泊有誰窺梗槩
艱危自古見英雄
乾坤怪得無清氣
却在溪山浙水東

時本道之訟未
直尚留葛溪

商山四皓圖

白髮相看歲月馳
高原深谷路逶迤
巴邛霜後應無橘
商洛春深正有芝
秦漢運移終不仕
唐虞世遠欲求之
高風不為儲皇出
羽翼雖成事可疑

題遊騎挾彈圖

平明挾彈出新豐
馳過宜春小苑東
百轉流鶯深樹曉
一番新雨落花風
路迷禁草連天碧
衣染宮桃照日紅
欲識平原公子意
豈無遺恨五陵中

題蕭可復隱士窈窕尋壑圖

綠鬢蒼髯雪不侵蕭然肯與世浮沈溪山自得煙霞趣
霄漢寧知雨露心淵底秋高黃獨美松根春暖茯苓深
柴桑有路無人識竹杖芒屨到處尋

題朝陽讀書圖送吳伯亮之官武陵

茆屋書聲何處尋五峯旭日到林陰梧桐早漾疎簾影
葵藿潛傾曉露心過隙白駒憐景急語梁玄燕識春深
柴關好為吾儕掩莫遣秋波思入吟

題明皇出獵圖

錢舜舉畫

皇州春滿雪消遲正是君王出獵時
輦路塵昏雙鳳闕掖垣鶯繞萬年枝
雲飛黃鵠鷹初健月滿雕弓馬載馳
却憶內園供奉日鹿銜花去已無知

題范蠡扁舟圖

戰勝歸來萬慮輕不將身世累浮名
五湖儘有閒風月兩國今無舊甲兵
遠禍高飛鴻鵠羽忘機深結鷺鷥盟
春風拂柳吳江上莫為西施一動情

月中桂

自植蟾宮不計春開時風露滿衣巾簪花亦有乘鸞女
倚樹元無待兔人萬斛天香浮海寓一枝雲影礙冰輪
霜寒蠹盡吳剛老穩歷凡間世劫塵

松

歷盡人間幾劫灰要將真節抗徂徠皴皮向日龍鱗繞
直幹凌雲鶴骨摧琥珀地深神變化茯苓根暖熟栽培
棲身不是安居穴梁棟應須屬大材

螢火

化形腐草復何求飛去飛來得自由松逕黑時青燐出
村塘密處火星流露華不濕輝輝夜月色那欺點點秋
羣聚沙囊光可燭茅齋空費讀書油

紅梅為張邦秀題

鶴膝橫空綠玉翹頂朱新試不全嬌香凝暈臉春先轉
暖溢丹砂雪易消殊色未知逢驛寄羣芳須讓賜緋朝
早知塞北無人識別寫新詞付麗譙

竹夫人二首

萬古湘娥淚不乾
南薰誰想又承歡
炎天似愛氷肌好
日暮翻疑翠袖寒
脉脉閨情羞粉黛
依依青夢倚琅玕
可憐一榻風漪滿
猶憶虛庭宿鳳鸞

近見依依引鳳凰
不因炎暑沐恩光
玉肌浣汗漣漪碧
素體含風粉黛香
魂夢淒涼驚歲月
淚痕零落謝君王
天寒自保堅真節
莫倚長門怨夕陽

夢故室

絃絕誰憐孤鶴飛
鏡空無復綵鸞棲
丁寧舊話生前別

損濕殘粧夢裡啼
郢樹煙暈魂欲斷
楓林青處路應迷
客中爲爾添愁思
杜宇聲乾山月低

挽魯修隱士

已慕高情厭市朝
又看騎鶴上青霄
延陵不惜留神劍
宋玉何堪賦大招
嶺雲深芝翳翳
小山月冷桂蕭蕭
寒泉秋菊如堪薦
擬向風林借一瓢

投分憲萬食事三十韻

聖代敷文教
臺官肅憲綱
史塵清上國
化雨沐炎方
華

衮曾親補龍泉肯鈍鋌心腸堅鐵石聞望美珪璋永皎
當空月春隨滿路霜羽儀專楚地威望振饒陽歷水朱
旗穩浮波彩鷁長自天垂德澤連郡仰休光持斧先求
雋埋輪竟効梁廟廊聲譽鵠寰宇姓名香大本需培植
斯文藉主張尊經傳魯史論道對虞庠喚友林鶯切推
賢泮藻芳明明修禮樂濟濟重綱常往昔來徵辟愚蒙
賴舉揚曉星隨去棹春雨濕行裝天意憐衰朽人心樂
退藏不才淹歲月多病愧冠裳忝竊三年祿寧窺數仞

墻仲由先入室賈誼亦升堂宦拙官宜冷形勞鬢已蒼
於時復何補揆道更難忘皂帽真慵裹青衿匪自強斯
須成落積久見荒唐寡與朋簪少恒飢稚色涼致身
難即鹿處世若亡羊客詫工齊瑟入歌類楚狂途窮遭
白眼時難厄黃楊趨走非吾事飄蓬宜異鄉銘心知賞
激拭目覩明良

壽馬太守長律三十四韻

海岱英雄地青齊霸主州大才天所靳名士古無儔籍

甚家聲遠淵焉世德求儀型追往哲文雅邁前修光武
那慙援常何屢薦周與時俱上下隨俗漫沈浮已得清
貧趣寧知富貴羞荆山藏卞璞豐縣秘吳鉤呂尚先垂
釣長沮未輟耰祇能穿鐵硯寧復敝貂裘治代文明畫
徽音渙汗秋隱居求所志徵士拔其尤畫省陪尊俎彤
庭拜冕旒旌麾辭上國繡斧按遐陬貪墨成深遯疲勞
得少休共能歌德政誰復快恩讐命駕黃牛峽揚舲白
鷺洲瞿唐高不顧蜀道險無憂牢落憐工部精忠羨武

侯傷心斜谷口懷古滾西頭渤海情初決膠東志未酬
分符雖足賀遮道竟無由陋郭那淹足平波且順流饒
陽迂宦轍彭蠡駛行舟綠埜耕桑樂黃堂禮數優民心
懷惠愛士論見歌謳尊酒介眉壽雄文賦遠遊翬翩伸
祝頌交錯獻觥籌有道朱顏駐無心鶴髮留靈椿蒼翠
晚丹桂綠陰稠美化行江漢儒風感魯鄒芹宮鶯睨睨
萍野鹿呦呦澤潤涵淵海風行速置郵鳳池需獻納麟
閣待謀猷

馬守密人名真由湖廣憲僉遷綿州知州就任除廣信知府喜吐納金丹之術

遊鍾山寺

野樹遷鶯合官橋信馬通
亂山晴入畫連觀曲成虹
岸篠藏春碧林櫻墜晚紅
客行青嶂外人倚翠樓東
迢遞經禪塔迂迴謁闕宮
梵天花繚繞宸翰玉穹崇
蘭氣梅林霧茶香驚嶺風
草眠分下鹿雲射散歸鴻
霸業銷沈裏江河指顧中
幾人增感慨千古見英雄

元日見馬御史貫

千里山城御史過
共看飛旆擁鳴珂
履端自覺時方泰

布令欣逢吉始和驄馬行春驕蹠躡勇冠簪曉鬱塞我
紫薇香藹鳳毛集翠栢影斜烏尾訛民厚只今無獄訟
官清何處不弦歌橫經每亦思南郡破敵真能繼伏波
甘雨普天膏澤下清霜盈路早寒多光分雲漢三秋月
派出崑崙九折河詩向玉堂携綵筆酒從丹宸倒金荷
渥洼頌洞來天馬牛斗光芒接太和聖代文章歸黼藻
人心禮樂在漸摩春臺未必無氷蘖寒谷爭知有薜蘿
淺薄匪才甘自棄蕭條吾道竟如何寤言幸竊斯文庇

蚤夜銘心誓弗磨

西巖樵隱

一入西巖路杳茫
華陽句曲漫蒼蒼
霧羶荒磴青苔黑
風滿石床高樹涼
幽谷鶯啼花似錦
柴門犬吠月如霜
觀棋邂逅歸何晚
換酒從容醉不妨
雲倒懸崖棲虎豹
竹臨哀壑度笙簧
鄰人愛覓胡麻飯
野老宜分白鹿裳
道在豈辭筋力倦
迹疎猶恨姓名香
餐芝歲久渾商洛
採蕨春深自首陽
稚子晨昏陪笑語
良朋鷄黍問行藏

輕蓑短笠情偏好大森高牙勢久忘亦有梗楠供雨露
那無松栢困牛羊相逢一一煩珍愛材大終期任棟梁
東劉子縉省郎

何處還堪一舉杯城南風軟少塵埃青山滿郭遊人醉
芳草迎車使者來村店野橋郊遠近禪宮仙館路縈迴
落花隨意飄紅雨飛絮多情點綠苔詩思漫因臨眺得
笑顏非為管絃開琅峯曉日光如洗靈岫春雲雪作堆
樗櫟每慙淹薄宦菁莪今喜育英才轅門有鵠鸞弧出

泮水無芹採藻回檣燕留人渾不斷杜鵑啼血莫相催
山中亦有桃千樹何必劉郎去後栽

壽黃貳守琮七言長律十六韻

九月九日

西浙澄波浸五湖平江王氣壓三吳故家禮樂新文運
澤國山河舊霸圖昭代賢才誇奕世中州清淑出名都
雲高北海翻鵬翼塵滿南陽識鳳雛羣史六經那輟誦
萬言九制不操觚場中策對三千字天上名傳第幾臚
匹馬春風行隴華雙旌夜月過延廊煌煌肘後懸金印

濟濟腰間綰玉符
中部琴堂思撫字
上饒鈴閣聽傳呼
溪山水玉平安好
錦繡文章世代無
童子何知親較藝
老儒猶幸借噓枯
九年已喜陪高義
一見真如謁大巫
南極星辰光照室
重陽時節慶垂弧
芳馨香藹羅椿桂
翠碧交加映竹梧
珠玉未須辭瓦礫
蘋蘩非敢薦潢汙
壽觴欲折黃花泛
不與陶潛共酒徒

襍詠四首

省山隨意出城東
歸路行吟思不窮
微月滿橋煙浸水

朔風吹起暮天鴻

故人別去我遲遲東望音書迥不知
寒意逼人歸興懶
市橋煙雨立多時

行盡郊原不見梅一時鄉思上心來
故山遙憶鶯湖路
傲雪凌霜幾樹開

越王臺上鷓鴣啼七里岡頭滑滑泥
欲識故人無限意
晚煙疎柳畫橋西

臘脂梅

不著京塵染素衣
賞心還自愛芳菲
晚來東閣無詩興
帶得紅粧馬上歸

舊是僊人萼
綠華手持絳節
弄朝霞
何人與換南枝骨
冷蘂疑餐伏火砂

紅梅花

冰雪姿容舊寫真
一枝曾寄隴頭人
相逢若問真消息
為說江南別有春

離述陂

惜騰醉眼未全醒
厭聽栖鴟達旦鳴
欵段踏穿楊柳月
快人拂面曉風輕